



## INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: [kult@mladi.org](mailto:kult@mladi.org)

Tel.: 033 778 778; fax: 033 778 779

Web: [www.mladi.org](http://www.mladi.org)

### ✚ SVE BLIŽE STRATEGIJI PREMA MLADIMA U FBiH

Mladima u Federaciji BiH trebaju bolja zakonska rješenja, treba ih bolje informisati i treba za njih izdvajati više budžetskih sredstava u svim oblastima. Ovo su samo neki od zaključaka dvodnevnog dijaloga „Strategija prema mladima u FBiH“ koji je održan između predstavnika Radne grupe za izradu Strategije prema mladima FBiH i predstavnika oko 80 nevladinih organizacija koje se bave mladima, omladinskih udruženja i vijeća mladih. Zaključci sa ovog dijaloga biće korišteni kako bi se kreirala prva Strategija prema mladima u FBiH. Organizatori događaja „Dijalog: Strategija prema mladima FBiH“ jako su, tvrde, zadovoljni urađenim. „Posebno nam je drago što mladi učestvuju u kreiranju prvog strateškog dokumenta koji im je namijenjen. Na osnovu ovih zaključaka, kreirat će se, nadamo se do kraja ove godine, prva Strategija prema mladima u FBiH“ – istakla je Katarina Vučković iz Instituta za razvoj mladih KULT.



Usvajanje Strategije prema mladima, na svim nivoima u Federaciji, uslovljeno je Zakonom o mladima FBiH čije je donošenje inicirao Institut za razvoj mladih KULT i koji je usvojen u junu 2010. godine. Proces izrade Strategije prema mladima koordinira Federalno ministarstvo kulture i sporta, a Institut za razvoj mladih KULT je, odlukom Vlade FBiH, imenovan za pružanje stručno – konsultativne podrške u tom procesu.

### ✚ POBOLJŠATI POLOŽAJ MLADIH U USK

Jasmin Bešić, izvršni direktor Instituta za razvoj mladih KULT sastao se sa predstavnicima vlasti Unsko-sanskog kantona, sve sa ciljem da se zajedničkim djelovanjem vladinog i nevladinog sektora poboljša položaj mladih u tom kantonu.

Sastanci su obavljani sa gosp. Izudinom Saračevićem, premijerom USK, sa gosp. Edinom Behrićem, načelnikom Općine Velika Kladaša, te sa gosp. Damirom Hodžićem i gospodinom



Kenanom Keserovićem, predsjedavajućim i zamjenikom predsjedavajućeg Komisije za obrazovanje, nauku, kulturu, sport i mlade pri Skupštini USK. Razgovor je vođen o načinima putem kojih se može poboljšati položaj mladih u ovom kantonu.

Jasmin Bešić, izvršni direktor Instituta je istaknuo vidove podrške koju Institut može pružiti Vladi USK-a. „Naša misija je da pružimo stručnu podršku institucijama vlasti da bi vlasti mogle pomoći mladima“. Dodao je da je Institut spreman pomoći i u obučavanju osoba koje će činiti radnu grupu za izradu strategije, koja je obaveza svih kantona. Predstavnici vlasti u USK su naglasili da su spremni za donošenje strategije prema mladima, ali i za druge načine koji će pomoći mladim ljudima.

#### POČELO ISTRAŽIVANJE O BUDŽETSKIM POTICAJIMA BH. PRIVREDI

Institut za razvoj mladih KULT, u okviru inicijative „Poslovni prostor BH“, započeo je istraživanje o raspodjeli budžetskih poticaja za razvoj privrede u Bosni i Hercegovini. Cilj je da se analizira stanje u oblasti finansijske podrške privredi od strane institucija vlasti i kreiranje smjernica za usmjerenu podršku perspektivnim granama privrede.

Istraživanje se odnosi na budžetsku podršku privredi koju su institucije vlasti na svim nivoima pružale u 2013. i 2014. godini, u vidu bespovratnih (grant) i povratnih (kreditnih) sredstava. Upitnik o poticajima za razvoj privrede dostavljen je krajem aprila na adrese više od 250 institucija vlasti u BiH: svim općinama u BiH, kantonalnim, entitetskim i državnim ministarstvima koji u svom djelokrugu imaju privredu, službama za zapošljavanje, razvojnim bankama, pojedinim agencijama i dr.

#### U BOSNI I HERCEGOVINI USPOSTAVLJENA ČETIRI ONLINE UMiD (UČI, MISLI I DJELUJ) CENTRA

U Jablanici, Sarajevu, Srebrenici i Velikoj Kladaši otvoreni su online UMiD centri. Institut za razvoj mladih KULT javnim pozivom pozvao je omladinske organizacije iz cijele BiH da apliciraju i tako postanu jedan od četiri regionalna online UMiD centra u BiH.

U konačnici, izabrani su OK „Pod istim suncem“ iz Jablanice, Udruženje „Nautilus“ iz Sarajeva, Udruženje „Prijatelji Srebrenice“ iz Srebrenice, te Demokratska organizacija mladih iz Velike Kladaše. UMiD obuka do sada je obavljena 11 puta u učioničkoj verziji, te je, zbog velikog interesa mladih, odlučeno da obuka postane dostupna i u online verziji – tvrde iz Instituta za razvoj mladih KULT.

„Krajem juna, u sva četiri regionalna centra, organizirat ćemo regionalne konferencije kojima će prisustvovati oko četiri stotine mladih koji će biti prvi polaznici/e ove obuke“ – istako je Jasmin Bešić, izvršni direktor Instituta za razvoj mladih KULT. Na kraju, dodao je da će svi mladi koji uspješno završe obuku dobiti certifikat. Još važnije, tvrdi, dobit će praktična znanja i vještine koje će u budućnosti moći iskoristiti u poslovnom svijetu.

#### VEDRANA SEKSAN: KADA POKUCATE NA STOTINE VRATA, JEDNA ĆE SE OTVORITI

„Kada sam diplomirala, dugo nisam mogla naći posao. Nije me to obeshrabrilo. Nisam čekala konkurse, kucala sam na sva vrata. Dok se, napokon, jedna nisu otvorila.“ Vedrana Seksan, bosanskohercegovačka glumica i kolumnistica bila je gošća sesije Kafa sa.. u Spajalici.

Govorila je o svojim uspjesima ali i neuspjesima, o porodici i o poslu. Kaže, kada nešto dovoljno želiš, sve se može uskladiti i stići. Opušteno ali i edukativno druženje trajalo je dva sata.



Goste Spajalice zanimalo je koje su Vedranine najdraže uloge, koliko je za nju značila prva velika uloga? Kako stiže balansirati između porodice, majčinstva, glume, pisanja i volonterskog rada? „Volim svoju porodicu – supruga i djecu. Jako volim i svoj posao. Sve se može stići i u svemu možeš biti dobar“ – istakla je Vedrana Seksan.

#### ONLINE AKTIVIZAM – ZNAMO KAKO DONIJETI PROMJENE

Moguće je „online“ boriti se za promjene! Online aktivizmom mladi ljudi mogu direktno i indirektno doprinijeti svojoj lokalnoj zajednici, ali i šire, promovišući i zalažući se za ideje i aktivnosti koje će imati pozitivan ishod.

Promotivnom akcijom „Online aktivizam za početnike“, predstavnici Instituta za razvoj mladih KULT, upoznali su danas građane Sarajeva sa internetskim alatima kojima se mogu postići društvene promjene. Podijeljeno je oko 500 brošura u kojima je ukazano na prednosti korištenja interneta u aktivizmu. U brošuri je prikazano više od 10 online alata sa detaljnim uputstvima - kako, kada, gdje i u koje svrhe ih koristiti.

„Uz pomoć jednostavnih alata na internetu možete sami napraviti web-stranicu, osnovati stranicu na Facebooku i nalog na Twitteru, snimiti video i lako ga montirati, organizirati uživo prijenose događaja.

Možete organizirati online peticiju, sakupljati novac za novu ideju, predstaviti istraživanje i pisati o tome na blogu.

Sve ove platforme možete povezivati jednu s drugom – objasnila je Mirela Ajanović, voditeljica projekta UMiD online u Institutu za razvoj mladih KULT.



Dodala je da su ovo samo alati koji mogu olakšati mnoge stvari, ali da pravu promjenu donose upravo građani i to svojim aktivnostima.

„Raduje nas da su građani Sarajeva, posebno mladi, bili zaista zainteresovani da čuju ono što smo željeli reći. Drago nam je da su mladi s nama podijelili pozitivna iskustva i da se neki od njih već dobro koriste online alatima i da su već dobri aktivisti – zaključila je Ajanović. Inicijativa je podržana od strane UNDEF-a.